

Bbaruha Gyakubanza Ginyakuhandiikwa Yohaana Kwanjuura

Bbaruha gigi gyegebeerwe nka *Bbaruha gya Yohaana gyakubanza*, gyahandiikiirwe mukwenda Yohaana. Yaagihandiikiiri beikiriza ba Kurisito bensei. Yaagihandiikiiri na bigyendeerwa bibiri: Kyakubanza yendeerye kusoboresya bantu banyakwikirizanga mu Yesu, kwicala nibali mu humweji na Ruhanga, na Mwana waamwe Yesu Kurisito. Kandi gyahandiikiirwe habwa kuhabura habwo beikiriza ba Yesu kwerinda kuhondera beegesa ba bugobya. Beegesa habwo beegesyengi nibakoba nti, Yesu atakabbe muntu muhwizulu, kandi atakabbe Ruhanga muhwizulu.

Nahabwakikyo, mu ngeru gya kulwanisya gigyo nzegesya gya bugobya, muhandiiki wa bbaruha gigi yaahandiikiiri niyolokya nti, Yesu Kurisito yaabyaliirwe na mubiri nka bantu bensei kubabba. Kindi yaakobiri nti, habwo bensei beikiririza mu Yesu Kurisito balina kuhondera biragiro bya Ruhanga, na kubba na ngonzi na bejira baabu.

Bicweka Bihandu bya mu kiki Kitabbu nka Kubihonderegeeni

(i) Ndagiiri 1:1-4

(ii) Kyererezi na Ntiti 1:5—2:29

(iii) Baana ba Ruhanga na ba Sitaani 3:1-24

(iv) Mananu na Bugobya 4:1-6

(v) Bujunaanizibwa huli mu kubba na Ngonzi 4:7-21

(vi) Kusingura kuli mu Kwikiriza 5:1-21

Kigambu kya Bwomi

¹ Tukubahandiikira kubaweera bintu bikukwatagana na yogwo Kigambu kya bwomi munyakubbaho kuruga kadei, mu kubanza na kubanza. Yooyo yogwo gitwegwiri naakutuweera bigambu byamwe, yooyo yogwo gitwaweeniho na meiso geetu, kandi de twamukwataho na ngalu zeetu. ² Yogwo agaba bwomi, buyeiziri mu nsi, twamuweeni; bibyo bitwaweeni byobyo bitukuheera bukeiso. Tukubaweera nti, yooyo bwomi butamalikaho munyakubba na Bbaa weetu Ruhanga, kandi yooyo munyakwiza muli twe. ³ Yogwo gitwaweeni kandi twegwa bigambu byamwe, yooyo gitukubaweeraho, aleke mubbe na humweji natwe, habwakubba tuli mu humweji na yogwo Bbaa weetu hamweji na Mwana waamwe Yesu Kurisito. ⁴ Nahabwakikyo tubahandiikiiri bibi bigambu aleke nanywe musobore kusemererwa hoji hamweji natwe.

Ruhanga abba Kyererezi

⁵ Bibyo bigambu bitukubaweera byobyo bitwegwiri Kurisito naatuweera nti, Ruhanga abba kyerezezi, kandi muli yo tihabbamwo ntiti kadi na kadooli. ⁶ Twabba nitukukoba nti tuli mu humweji na Ruhanga, beitu kandi nitukulibatira mu ntiti, buho tuli mu kugobya; tuli kwahi mu kukora mananu. ⁷ Beitu twakabba nitukwicala mu kyerezezi, nka Ruhanga kweicala kyerezezi, buho tukubba nituli mu humweji nanywe, kandi neibbanga lya Yesu, Mwana waamwe, likubba litunaabyaho bibii byetu byensei.

⁸ Twakabba nitukukoba nti, tituli na kibii, tuli mu kwegobyagobya, na mananu ga Ruhanga gakubba gatali muli twe. ⁹ Beitu kakubba twatula bibii byetu hali Ruhanga, abba mwesigwa kandi mwinganiza kutuganyira bibii byetu na kutunaabyaho butadoori bwensei. ¹⁰ Kandi

twakabba nitukukoba titukakoranga kibii, tukubba nitukufuora Ruhanga kubba mugobyanya, na kigambu kyamwe kikubba kitali muli twe.

2

¹ Nywe baana bange, nkubahandiikira bibi bigambu aleke mutalikora kibii. Beitu haakabba nihaloho muntu yensei akoori kibii, twicala na yogwo atutonganiira hali Bbaa weetū, yooyo Yesu Kurisito mwinganiza. ² Yooyo kyonzira kya bibii byetu, hatali bibii byetu bisa, beitu na bibii bya bantu bensei.

³ Twakabba nitukuhondera biragiro byamwe, bubuwo tukubba nitukwolokya nti tumwegiri. ⁴ Yogwo yensei yeetwala kubba amwegiri beitu atakuhondera biragiro byamwe abba mugobyanya, na mananu ga kigambu kyamwe gabba gatali muli yo. ⁵ Beitu yogwo yensei ahondera biragiro byamwe, yogwo yooyo ali na ngonzi zijanjeeni kurungi na za Ruhanga. Mu kubba na ngonzi zizo bubuwo tubba twegeeri kimwei nti kwo tuli bamwei. ⁶ Yogwo yensei akukoba, “Ndi hamwei na Ruhanga,” alina kwetwala nka Kurisito kuyetwalengi.

Kiragiro Kihyaka

⁷ Banywani bange, kiragiro kikyoo kimbahandiikiiri tikili kihyaka, beitu kili kiragiro kikadei kimwaheebere ku-ruga hamwatandikiiri kwikiririza mu Kurisito. Kikyoo kiragiro kyokyo kya bigambu bimwegwiriho. ⁸ Beitu kandi de, kili kihyaka, habwakubba mu kuhondera kikyoo kiragiro, Yesu Kurisito yoolokeerye mananu gaakyo, nanywedede mukyolokeerye nka kukili kya mananu. Kili kihyaka de habwakubba ntiti gili mu kumalikaho, kyererezi kitandikiiri kwaka. ⁹ Yogwo yensei akoba nti, ali mu kyererezi, beitu kandi akabba na nnobi hali beira baamwe, yogwo muntu akubba naacaali mu ntiti. ¹⁰ Yogwo yensei abba na

ngonzi na mwira waamwe, akooora bintu byamwe hasyanu mu kyererezi, tihaloho kintu kyensei kikusobora kumuha kukora kibii. ¹¹ Beitu yo yogwo ali na nnobi hali mwira waamwe abba mu ntiti, kandi de abba naakulibatira mu ntiti; abba ateegiri cali akugyenda, haɔwakubba ntiti gibba gimwijeiri meiso.

¹² Nywe baana bange mu kwikiriza, nkubahandiikira bibi bigambu
haɔwakubba bibii byenyu byaganyirwe mwibara lya Yesu Kurisito.

¹³ Nywe bahandu mu kwikiriza, nkubibahandiikira
haɔwakubba mumwegiri, yogwo munyakubbaho kuruga mu kubanza na kubanza.

Nywe basigazi mu kwikiriza, nkubibahandiikira
haɔwakubba musingwiri Sitaani.

Nywe baana bange, nkubibahandiikira
haɔwakubba mwegiri yogwo Bbaa weetu.

¹⁴ Nywe bahandu, nkubibahandiikira
haɔwakubba mumwegiri, yogwo munyakubbaho kuruga mu kubanza na kubanza.

Nywe basigazi, nkubibahandiikira
haɔwakubba muli ba maani,
kandi kigambu kya Ruhanga kiicala muli nywe,
kibaheeri kusingura Sitaani.

Muleke Kwegomba Nsi

¹⁵ Muleke kwegomba nsi rundi kintu kyensei kya mu nsi. Yogwo yensei yeegomba nsi, abba atakwendya Bbaa weetu, Ruhanga. ¹⁶ Haɔwakubba bintu byensei bya mumu mu nsi: kubbe kwegomba kubiibi kwa ha mutima, kwegomba kubiibi kwa mubiri, na kwetembya nka ali neitungo, bibba bintu bitakuruga hali Bbaa weetu, beitu bya nsi. ¹⁷ Nsi na kwegomba kwagyo bikwiza kumalikaho,

beitu yo yogwo akukora bya Ruhanga biyendya alyomeera biro byensei.

Banyanzigwa ba Kurisito

¹⁸ Baana bange, kasumi ka mmaliira gya nsi kali heehi kudwa. Nka kubaabweereeri nti munyanzigwa wa Kurisito akugyenda kwiza, kandi na hataati banene muli bo bamaari kadei kwiza. Kikyo kyokyo kituheeri kwegu kasumi ka mmaliira nka kukali heehi. ¹⁹ Bo babwo bantu baarugiri muli twe, beitu mu mananu batakabbe beira beetu. Kubba, hubaakubbeeru nibali beira beetu, bakabba nibacaali natwe. Beitu kugyenda kwabu kwolokereerye kimwei nka kubaalingi batali beira beetu.

²⁰ Beitu nywe, Yesu Kurisito yaabaheeri Mwozo Musyanu, kandi nywensei gagwo mananu mugeegiri. ²¹ Kigyendeerwa kya kubahandiikira gagwo mananu, kitakabbe nti habwakubba timugeegiri, beitu habwakubba nti mugeegiri. Kandi de mukyegiri nti hugobya tibukab-bangamwona mananu. ²² Mugobya yooyo naani? Mugobya tiyooyo yogwo akugaana Yesu nka kwali Kurisito, Mutongoole wa Ruhanga? Yogwo yensei yeegaana Bbaa weetu na Mwana, yogwo yooyo munyanzigwa wa Kurisito. ²³ Yogwo yensei yeegaana Mwana abba atali na Bbaa weetu. Habwakubba yogwo yensei yaatula nti eikiririza mu Mwana, abba de naali na Bbaa weetu. ²⁴ Nahabwakikyo mute mitima myenyu ha biyo bintu bimwegwiri kuruga ha mwatandikiiri kwikiririza mu Kurisito. Biyo bintu bimwegwiri, hubishiicala muli nywe, hupwo nanywe de muliicala mu yogwo Mwana na mu Bbaa weetu. ²⁵ Kubba kiki kyokyo Kurisito kiyaturaganisiirye: bwomi butamalikaho.

²⁶ Nkubahandiikira bibi bintu mwa kubaweera nti haloho bantu bakwendya kubagobya. ²⁷ Beitu kandi nywe, mitima myenyu nka kumilimwo Mwozo Musyanu,

wa Kurisito giyaabaheeri, yogwo Mwozo eicala muli nywe. Nahawakikyo timukwetaaga muntu wondi yensei kubeegeesya, kubba yogwo Mwozo waamwe abeegeesya bintu byensei bya mananu, bitalimwo bugobya. Nahawakikyo, kusigikira Mwozo waamwe nka kwabeegeesya, mwicalenge mu Yesu Kurisito.

²⁸ Nahawakikyo, nywe baana bange, mwicalenge muli yo, aleke bwalibba eiziri atwagye nituli basigiku, tutali na nsoni kwemeera mu meisso gaamwe kumutangiira. ²⁹ Nka kumwegiri nti Kurisito yooyo abalwa kubba naakusimwa mu meisso ga Ruhanga, muli na kwega de nti bawo bensei bakora bintu bikusimwa mu meisso ga Ruhanga boobo bali baana ba Ruhanga.

3

Kwicalanga nka Baana ba Ruhanga

¹ Mubanze muwone Bbaa weetu nka kuyaatwendeerye hoi, twadwa na ha kwetwa baana ba Ruhanga! Tuli baana baamwe kwo. Beitu bantu ba nsi bawo bateikiririza mu Ruhanga, bamwegiri kwahi, nahawakikyo beegiri kwahi nka kutuli baana ba Ruhanga. ² Banywani bange, hataati tuli baana ba Ruhanga; kikyo kitukwiza kubba kicaali kwegebwa. Beitu tukyegiri nti Kurisito bwaliira, tulibba nka yo, kubba tulimuwona nka kwali. ³ Na bawo benseenya bali na kukwo kunihira, bakusemeera kusyanja mitima myabu nka Kurisito kweicala musyanu mutima.

⁴ Muntu yenseenya akora kibii abba abinyiri kiragiyo kya Ruhanga, hawakubba kukora kibii kwokwo kubinya kiragiyo kya Ruhanga. ⁵ Beitu mukyegiri nti Kurisito yeiziri mwakutoolaho bibii byetu, kandi nti muli yo tihabbamwo kibii. ⁶ Muntu yensei abba mu Kurisito eicala

kwahi naakora bibii. Beitu yogwo yensei eicala naakora bibii, takawonanga Kurisito kandi tamwegiri.

⁷ Baana bange, muteikiriza muntu yenseenya kubahabisa. Muntu akora bintu bidoori abalwa kubba naakusimwa mu meiso ga Ruhanga, nka Kurisito kwabalwa kubba naakusimwa. ⁸ Muntu akora bibii abba wa Sitaani; habwakubba Sitaani eiceeri naakora bibii kuruga nsi nigihangwa. Nsonga ginyakuleeta Mwana wa Ruhanga mu nsi gyali gya kuzikya bintu byenseenya bya Sitaani byakora. ⁹ Tihaloho muntu yenseenya munyakubyalwa Ruhanga eicala naakora bibii, kubba buhangwa hwa Ruhanga hubba mu yogwo muntu. Tasobora kwicala naakora bibii kubba Ruhanga abba amufoori mwana waamwe. ¹⁰ Nyahukana giicala hakati wa baana ba Ruhanga na baana ba Sitaani gyogyo gigi: Babwo bantu benseenya batakora bintu bidoori rundi batendya beira baabu, babba kwahi baana ba Ruhanga.

Mwendyenge Beira Beenyu

¹¹ Bukwenda humwegwiri kuruga humweikiririize mu Kurisito bwakobengi nti: Tukuteekwa kwendyangananga. ¹² Tutabba nka Kaini munyakufugwa Sitaani yeita waabu. Kyani kinyakumuha kumwita? Yaamwitiri habwakubba yo Kaini yaali na bikorwa bibiibi kandi waabu naali na bikorwa birungi. ¹³ Beikiriza ba Kurisito beira bange mutahuniiranga kuwona bantu ba nsi babanobiri. ¹⁴ Butwendya beikiriza beira beetu, kibba nikikwolokya nti twarugiri mu kukwa tweingira mu bwomi. Muntu yenseenya atendya beikiriza beira baamwe, yogwo muntu abba naacakafugwa maani ga luku. ¹⁵ Yogwo anoba mwikiriza mwira waamwe, abba mwiti. Kandi mukyegiri nti mwiti atunga kwahi bwomi butamalikaho.

¹⁶ Mu mulingo gugu twetegereza makuru ga ngonzi nti, Yesu Kurisito yaaheeriyo bwomi bwamwe habwetu, natwede tukusemeera kuhayo bwomi bwetu habwa beira beetu. ¹⁷ Kakubba muntu yensei ali neitungu lya nsi, awona mwira waamwe naali na kyetaagu beitu kandi akabula kumugiira mbabazi, bubwo de yogwo muntu yaakakoba nti yo yendya Ruhanga? ¹⁸ Baana bange, tulekere hahwo kubazanga-bubazi nti twendyanganana mbe, beitu twendyanganenge na mu bikorwa kandi mu mananu. ¹⁹ Butukukora kikyoo, tukwega nti tuli ba mananu, kandi na mitima myetu nitumiha kuteekana mu meiso ga Ruhanga. ²⁰ Mitima myetu bumikutucwera musangu, tukuteekwa kukyega nti Ruhanga eicala wa hakyendi hoj kukira bintu bya mitima mikutujunaana, kandi nti Ruhanga yeegiri bintu byensei.

²¹ Banywani bange, kakubba mitima myetu mibba mitakutucwera musangu, bubwo tukubba tutali na kintu kyenseenya kitukutiina mu meiso ga Ruhanga. ²² Kandi bintu bitukumusaba, akubituha, habwakubba tukwata biragiro byamwe kandi tukora bintu byasijima. ²³ Kandi kiki kyokyo kiragiro kyamwe: twikiririze mwibara lya Mwana waamwe Yesu Kurisito, kandi twendyengenenge nka kuyaragiiri. ²⁴ Babwo bahondera biragiro bya Ruhanga beicala mu Ruhanga nayo neicala muli bo. Yogwo Mwozo wa Ruhanga giyaatuheeri, yooyo atumanyisya Ruhanga nka kwakwicala muli twe.

4

Mulengenge Myozo Kwetegereza Hamirugiri

¹ Banywani bange, muteikirizanga buli muntu yenseenya akukoba nti, yo ali na Mwozo wa Ruhanga; beitu mulengenge myozo mili mu babwo bantu, mwa kwetegereza myakabba kwo mirugiri hali Ruhanga,

habwakubba mumu mu nsi halimwona baragurī banene ba ħugobya. ² Gugu gwogwo mulingo gwa kwetegereza bantu bali na Mwozo wa Ruhanga: Muntu yenseenya akoba nti, Yesu Kurisito yaarugirī hali Ruhanga yaabyalwa mu mubiri, yogwo abba naali na Mwozo arugirī hali Ruhanga. ³ Beitu yogwo yenseenya akoba nti, Yesu atakabyalwe mu mubiri, abba atali na Mwozo arugirī hali Ruhanga. Yogwo muntu abba naali munyanzigwa wa Kurisito. Gugwo mwozo gukumulwanisya guliiza mu nsi, nka mwegwirī na hataati, gudoori kadei haha.

⁴ Beitu nywe baana bange, muli ba Ruhanga. Musingwirī baragurī ba ħugobya, habwakubba Mwozo wa Ruhanga ali muli nywe ali wamaani kukira mwozo ali mu bantu ba nsi. ⁵ Babwo baragurī ba ħugobya beicala ba nsi gigi. Nahabwakikyo bintu bibabaza, babibaza mu kwetegereza kwa bantu ba nsi, nikiha bantu ba nsi kubetegeerya. ⁶ Beitu twe, twicala ba Ruhanga. Na babwo benseenya beegirī Ruhanga, batwetegeerya mbe. Beitu babwo bateegirī Ruhanga batwetegeerya kwahi. Kwokwo yatyo twega muntu yaabba naali na Mwozo wa mananu, rundi naali na mwozo wa ħugobya.

Ruhanga Eicala Ngonzi

⁷ Banywani bange, tubbe na ngonzi hakati gyetu, kubba ngonzi ziruga hali Ruhanga. Yogwo yensei ali na ngonzi abba abyaliirwe Ruhanga kandi yeegirī Ruhanga. ⁸ Yogwo atali na ngonzi abba ateegirī Ruhanga, kubba Ruhanga eicala ngonzi. ⁹ Ruhanga yaatwolokeerye nka kwatwendya kuraba mu kutuma Mwana waamwe omwei musa eize mu nsi, aleke kuraba mu Mwana waamwe yogwo, tutunge bwomi butamalikaho. ¹⁰ Ngonzi

zinkubazaho zoozo zizi: Kili kwahi nti twetwe banyakwendya Ruhanga, beitu yooyo munyakutwendya, yaatumama Mwana waamwe abbe kyonzira kya bibii byetu. ¹¹ Banywani bange, Ruhanga amaari kutwendya hoi yatyo, twedede tukusemeera kwendyangananga. ¹² Tihaloho muntu yaakawonangaho Ruhanga; beitu butubba nitukwendyanganana, kikyo kyolokya nti Ruhanga eicala muli twe kandi de nti, twendya bantu nka kuyendya tukore.

¹³ Tukyegeeri kimweji nti twicala mu Ruhanga kandi nayo eicala muli twe kubba yaatuheeri Mwozo waamwe. ¹⁴ Twewoneeri, kandi tukuha bukeiso nti Bbaa weetu yaatumiri Mwana waamwe kubba Mujuni wa nsi. ¹⁵ Muntu yenseenya abaza hasyanu nti Yesu ali Mwana wa Ruhanga, Ruhanga abba naali muli yo, nayo naali mu Ruhanga. ¹⁶ Nahabwakikyo, tukwega kandi tukwikiriza nti Ruhanga atwendya mbe.

Ruhanga eicala ngonzi. Muntu yenseenya eicala na ngonzi, eicala mu Ruhanga, na Ruhanga neicala muli yo. ¹⁷ Tukuteekwa kwendyanga bantu mu bwizulu, aleke ha kiro kya kusala misangu tubbe batatiro tutali na kitukwetijina; kandi tukwiza kubba batatiro habwakubba nziicala gyetu mu nsi mumu gili gyogyo gimweji nagya Kurisito. ¹⁸ Ngonzi hazili, tihabbaho butijini kubba ngonzi za mananu zibinga butijini bwenseenya. Habwakubba butijini bwiza habwa kutijina kifubiro; makuru gaakyo, yogwo ali na butijini abba atali na ngonzi zizulu.

¹⁹ Twe twendya Ruhanga na bantu, habwakubba Ruhanga yooyo munyakubanza kutwendya. ²⁰ Kakubba muntu akoba, “Nyendya Ruhanga,” beitu kandi anobiri mwira waamwe, bubwwo yogwo muntu akubba naali mugobya. Kubba muntu yenseji atakwendya mwira gyakuwona, tasobora kwendya Ruhanga gyatakawonanga. ²¹ Kiragiro kya Kurisito kiyaaragijiri kyokyo kiki: Muntu

yenseenya yendya Ruhanga, akuteekwa nakwendyanga mwira.

5

Kwikiririza mu Mwana wa Ruhanga

¹ Muntu yenseenya eikiriza nti Yesu ali Kurisito, Muntongoole wa Ruhanga, abba abyaliirwe Ruhanga; kandi yogwo yensei yendya Ruhanga Bbaa weetu, yendya na mwana waamwe. ² Kiki kyokyo twegeraho nti twendya baana ba Ruhanga: Twe kwendya Ruhanga kandi nitukuhondera biragiyo byamwe. ³ Habwakubba twe kwendya Ruhanga kimanyisya tukwate biragiyo byamwe. Kandi biragiyo bya Ruhanga bitwozoheera kwahi, ⁴ habwakubba yogwo yensei munyakubyalwa Ruhanga asingura nsi. Kintu kisingura nsi kiicala kwikiriza kwetu mu Yesu. ⁵ Naani yogwo asingura nsi? Tali yooyo yogwo eikiriza nti Yesu eicala Mwana wa Ruhanga?

⁶ Yesu Kurisito yeiziri yeegebwa nka kwali Mwana wa Ruhanga kuraba mu kubatizibwa kwe mu meezi na mu kubbwoma ibbanga lye ha kukwa kwamwe. Atakeize mu meezi gasa, beitu yeiziiri mu meezi na mwibbanga. Kandi Mwozo wa Ruhanga yooyo keiso wa mananu gagwo, kubba yogwo Mwozo eicala mananu. ⁷ Halohoona bukeiso busatu: ⁸ Mwozo, meezi, neibbanga; kandi byensei bikiraniza mbe. ⁹ Twikiriza bukeiso hwa bantu, beitu bukeiso hwa Ruhanga hwo hwohwo bukiirayo kimwei habwakubba huli bukeiso hwa Ruhanga, kandi bukeiso buhu yaabuheeri hali Mwana waamwe. ¹⁰ Nahabwakikyo bantu benseenya beikiririza mu Mwana wa Ruhanga babba na bukeiso buhu mu mitima myabu; beitu bantu bateikiririza mu Ruhanga, bamufoori mugobya kubba tibeikiriza bukeiso hwa Ruhanga buyaaheeri hali Mwana waamwe. ¹¹ Buhwo bukeiso hwohwo buhu: Ruhanga

yaatuheeri bwomi butamalikaho kandi bwomi bubwu buli mu Mwana waamwe. ¹² Yogwo yensei abba na Mwana abba na bwomi bubwu; yogwo yensei atali na Mwana wa Ruhanga tali na bwomi.

Bigambu bya Kumaliira

¹³ Nywe beikiririza mwibara lya Mwana wa Ruhanga, mbahandiikiiri bibi bigambu aleke mukege nti muli na bwomi butamalikaho. ¹⁴ Bibi bigambu byobyo bituha kubba basigiku nitukugyenda hali Ruhanga: nti kakubba tusaba kintu kyenseenya kili mu kwendya kwamwe, akutwegwa. ¹⁵ Kandi butwakabba tukyegiri nti atwegwa mbe mu kintu kyenseenya kitumusaba, tukukyega nti tukwiza kutunga bintu bitumusabiri.

¹⁶ Kakubba muntu yenseenya awona mwira waamwe naakukora kibii kitaleetera muntu kukwa, yogwo muwona mwira akuteekwa kumusabiranga aleke Ruhanga amuhe bwomi. Kiki kikukwatagana na babwo bakora kibii kitaleetera muntu kukwa. Halohoona kibii kileetera muntu kukwa; nkukoba kwahi nti kiky kyokyo muntu akusemeera kusaba Ruhanga akimujune. ¹⁷ Kukora kintu kyensei kitadoori kibba kibii, beitu haloho kibii kitaleetera muntu kukwa.

¹⁸ Tukyegiri nti muntu yenseenya abyaliirwe Ruhanga eicala kwahi mu kukora bibii; beitu Kurisito munyakubyalwa Ruhanga amulinda mbe, kandi mubiibi yogwo tasobora kumukola kubiibi. ¹⁹ Tukyegiri nti tuli baana ba Ruhanga, kandi de nti nsi gyenseenya gikufugwa yogwo Mubiibi. ²⁰ Kandi de tukyegiri nti Mwana wa Ruhanga yeiziri yaatuha kwetegereza aleke twege Ruhanga wa mananu; kandi twe twicala mu yogwo Ruhanga wa mananu habwakubba tuli mu Mwana waamwe Yesu Kurisito. Yogwo Yesu Kurisito ali Ruhanga

1 Yohaana 5:21

13

1 Yohaana 5:21

wa mananu kandi yooyo atusoboresya kutunga bwomi butamalikaho.

²¹ Nywe baana bange banyendya, mwehale kuramya bisisani.

Ndagaanu Gihyaka

Gungu: Ndagaanu Gihyaka New Testament

copyright © 2017 Wycliffe Bible Translators, Inc.

Language: Gungu

Contributor: Wycliffe Bible Translators, Inc.

All rights reserved.

2020-11-17

PDF generated using Haiola and XeLaTeX on 14 Jun 2022 from source files dated 13 Jun 2022

b2d1b010-ce36-53f8-94bb-ea31f34239cc